

Q. D. B. V.

DISSERTATIO MEDICA
INAUGURALIS
PER VERSAM MEDEN-
DI METHODUM
IN
FEBRIBUS ACUTIS
SISTENS.

Quam
SUB AUSPICIIS DIVINI NUMINIS
GRATIOSÆ FACULTATIS MEDICÆ
Auctoritate & Consensu

Pro
GRADU DOCTORATUS IN
ARTE MEDICA RITE CA-
PESSENDO

Solenni ac Placido Eruditorum Examini

Ad. d. Mart. MDCC XXIII.

h. l. q; f.

submitte

JOH. HENRICUS LÜDERS
Hamburgens.

ARGENTORATI
TYPIS JOHANNIS HENRICI HEITZII.

V I R O
NOBILISSIMO, DOCTISSIMO
ATQVE EXPERIENTISSIMO
DOMINO
ANTONIO LÜDERS.
PRACTICO APUD HAMBURGENSES
FELICISSIMO
PARENTI COLENDISSIMO AMANTISSIMOQUE

In gratæ mentis tesseram

Dissertationem hanc Inauguralem
facram esse vult

Filius obedientissimus

JOH. HENRICUS
LÜDERS.



Præfatio.




Ti provida Natura in Macrocosmo per admirandam motuum Harmoniam omnia conservat, ita eadem perficit in Microcosmo, dum per motus vitales secretorios & excretorios elegantissime administratos corpus suum non tantum in statu sano conservare, sed & morbis afflicto, exquisitissimo motuum adauctorum concentu liberare conatur. Nullibi autem in statu Microcosmi nostri præternaturali hoc magis conspicuum est, quam in frequentissimo febrium diversarum negotio, quod quidem ab activo hocce principio non tantum salutariter atque methodice suscipitur, sed & plerumque si chronicas excipias febres & quasdam anoma-

A 2 lias,

lias, in individuīs contingentes, ad felicem perducitur finem. Ultinam vero huic methodo genuinæ à Natura nobis præscriptæ, omnes qui corporis nostri conservationem in se suscipiunt, insisterent; aſt quam dolendum contrarium potius quovis die evenire, dum plures incongruis partim, partim intempeſtive adhibitis medicaminibus, partim denique inconvenienter adminiſtrato regimine ordinem ſ. methodum Naturæ ſalutarem cum inſigni ſane & non raro deleterio corporis damno interpellant & perverſam plane reddunt. De qua quidem perverſa febres tractandi methodo quædam pro virium mearum tenuitate in medium proferre mecum conſtitui; cum vero omnium Febrium examen prolixioris ſit conſiderationis, ne diſſertationis limites excedam, in febribus tantum acutis earundemque methodo examinanda hac vice ſubſiſtere lubet. Faxit Deus omnis veritatis atque ordinis Auctor, ut omnia fiant methodice atque feliciter.

§. I.



§. I.

Cum contraria juxta se posita magis elucescant, opus esse existimo ut quid **METHODUS MEDENDI** s. tractandi vera & genuina, quid **FEBRIS** sit, paucis explicem. Est vero mihi illa præeunte *Barth. Castello* in *Lex. Med. Brevis*, certa & tuta via reducendi agros ad sanitatem pristinam, & hoc quidem, meo judicio, juxta ductum ipsius Naturæ: Hanc vero contemplor cum ingeniosissimo *Sydenhamio* *Prax. Med. S. I. C. I.* Tanquam conamen Naturæ, materiæ morbificæ exterminationem in ægri salutem omni ope molientis; Acuta autem febris est, quæ breviori temporis intervallo l. ad salutem, l. ad mortem ægri tendit: Perversa igitur febres has tractandi methodus ea erit, quæ ordinem Naturæ negligit, & neque remediorum convenientium, neque temporis, neque modi, neque mensuræ in exhibitione eorundem rationem habet; cum tamen hæc ipsa *Illustri Stahlio* teste in *Diss. De æstu mar. microcosm. §. 8.* Practicos ab Empiricis vere distinguant. Hæret igitur causa

A 3
hujus

hujus erroris , si rem accuratius perspiciamus, vel in ignorantia vel neglectu, 1) Materiæ morbificæ , quæ occasionem agendi, principio nostro vitali præbet. 2) Sedis morbificæ , quæ passionem sustinet. 3) Motuum Naturæ salutarium, quibus corpus ægrotum restituere conatur. 4) Locorum convenientium , per quæ hostem sibi imminentem s. materiam morbificam eliminare satagit. 5) Remediorum appropriatorum , quæ materiæ morbificæ opponi solent. 6) Denique Doseos atque temporis congrui, quo hocce fieri debeat. Quibus quidem vitiorum generibus methodus naturæ placida atque genuina non potest non perturbari & perversa reddi, ita ut loco exoptatæ valetudinis, vel morbi lenti, vel, novo Naturæ conamine activo, recidivæ, vel denique funestæ rerum metastrophæ exinde originem suam sumant: Quibus perspectis ad rem ipsam nos accingemus & universam acutarum febrium Historiam percurremus, tradituri ubique brevem cujusque febris theoriam, qua methodo in valetudine restituenda Natura utatur, & subjuncturi postea errores practicos, quibus salutaris hæc Naturæ intentio perverti solet.

§. II.

Ut igitur hujus rei initium faciamus dispiendum primo, quomodo FEBRES ACUTÆ distingui soleant : Sunt autem vel BENIGNÆ
mi-

mitiori cursu procedentes, vel **MALIGNÆ**, gravioribus stipatæ symptomatibus & periculosæ magis; Priores sunt vel **NON REMITTENTES** absque ulla æstus remissione conspicuæ, vel **REMITTENTES**, cum aliquali fervoris tranquillitate circa finem quorumlibet paroxysmorum conjunctæ. Ad illas referimus **Continentes**, febrem sc. **Synocham** & **Ephemeram**, nec non inflammatorias omnes: **Peripneumoniam**, **Anginam** & **Nephritidem**, tanquam satis frequentes; **Phrenitidem** vero **Paraphrenitidem**, **Pleuritidem**, **Hepatitidem** & **Splenitidem** tanquam non ita quotidie occurrentes: Febres porro biliosas **Causum** & **Choleram** quibus **Dysenteriam** epidemicam non immerito adjungimus. His, nempe remittentibus, accensemus **Febrem catarrhalem**, **Tertianam** & **Quartanam** continuas. **Malignæ** dividuntur in malignas stricte sic dictas & permalignas s. pestilentes. Ad has pertinent **Pestis** & **Sudor Anglicanus**, ad illas **Febris Catarrhalis maligna**, **Petechialis**, **Miliaris**, **Variolæ** & **Morbilli**. De quibus singulis speciatim jam agemus.

§. III.

Ex non remittentibus igitur I. sistimus **CONTINENTES**, Febrem scilicet **SYNOCHAM** & **EPHEMERAM**; incipit autem illa absque ullo frigore cum insigni corporis langvore & æstu, decursum suum continuat ad septimum

mum usque diem , quo in junioribus plerum-
 que per hæmorrhagias ; in senioribus autem
 per sudores largiores solvi solet. Hanc eva-
 cuationem Naturæ spontaneam, ob plethoram
 in corpore collectam excitatam, perturbamus,
 *) si ab initio morbi Purgantia & Vomitoria
 præcipue fortiora exhibeamus ; notum enim
 est in vulgus , quantas hæc etiam in corpori-
 bus plethoricis sanis excitent commotiones, ita
 ut exinde sæpissime non tantum cephalalgiae
 & obstructions corporis insignes , sed & alia
 reportentur incommoda ; quid igitur in malo
 nostro ad deplendam sanguinis quantitatem la-
 tura sint auxilii facile patet : nil enim nisi ma-
 jores sanguinis commotiones, stasibus facillime
 ansam daturas exinde impetramus. 3) Si Venæ
 Sectionem à principio utilem circa semi aut
 criticos demum dies in subsidium trahamus , à
 quo immaturo conamine incompletæ conge-
 stiones versus caput & stases inflammatoriæ
 tempore criseos contingentes suam postea du-
 cunt originem ; unde neque in diem tertium us-
 que eandem differendam esse bene judicavit
Raym. Joh. Fortis Tr. de febr. p. 3. Sed præmissis
 clystere illico & quidem largiorem celebran-
 dam , quia alias neglecta febris facillime in Phre-
 nitidem , Pleuritidem vel Anginam abit. 7)
 Si pro febre discutienda alexipharmacis calidio-
 ribus aut Salibus volatilibus utamur, orgasmus
 enim sanguinis exinde adaugetur & excretiones
 spontaneæ impediuntur partim, partim immature
 pro-

promoveantur , ita ut malum vel in morbos lentos cachecticos vel in inflammationes convertatur & placidus morbi genius hac ratione mirum quantum deterior reddatur. δ) Si ad dolores sedandos & agrypniā mitigandam opiata præscribamur : his enim tantum abest, ut aliquid boni efficiamus, quin potius ita sibus sanguinis , deliriis & comatibus occasionem præbeamus.

§. IV.

Ex eadem Classe producimus Febrē EPHEMERAM quæ pari modo ac memorata Febris Synocha absque horrore solo æstu & languore corpus nostrum invadit, eodemque tenore continuat ; illud autem differentiæ habet, quod vel post 24. horarum spatium , ubi Febrē Ephemerā simplicem constituit , vel post 4. aut 5. dies , ubi Ephemerā plurium dierum sistit , (quamvis tum improprie Ephemerā vocetur) largo ut plurimum sudore terminetur. Instituit autem Natura hunc motum febrilem uti in Synocha prægressa , ob Plethoram in corpore latentem & à causis variis commotam. Et quamvis *diariam omnem* ut verbis *Jod. Lommii Medicinal. Observat. L. 1. p. m. 2.* utar, curasse quam novisse (ob brevem ejusdem decursum) *facilius* sit ; Patet tamen Medicum , si spectatio morbi adhuc dum eidem concedatur, neque V. Snem administrare debere , ubi Na-

B tura

tura in excretionē sudoris jam est constituta, multo minus Vomitoria & Purgantia exhibere, plures pro evacuatione sua exposcentia horas, solutionem per sudores interea certissime inhibitura. Neque ignotum esse poterit insignem allatura esse noxam omnia calidiora, quæ Ephemeram non raro in Synocham transmutant. Sicuti vero hæc orgasmum sanguinis adaugent, ita acida in majori, quam par est, dosi propinata, humores coagulant & sudoris excretionem impediunt; unde febres hæ leniores non raro in lentas convertuntur. Quæ de Opiatis in antecedente febre monita, & in hac dicta funto.

§. V.

A continentibus ad INFLAMMATORIAS pergimus, ex quibus primo loco nominamus PERIPNEUMONIAM, tanquam omnium frequentissimam. Quæ enim *Sydenh. Prax. Med. S. 7. C. 3. pag. m. 330.* de Pleuritide retulit, quod hic morbus tempore inter ver & æstatem ambigente præcipue homines invadat, applicamus potius huic, qui plerumque Pleuritidis nomine ab Auctoribus exprimi solet. Habet autem suam originem Peripneumonia à sanguine abundante commoto, ob causas vero externas, imprimis vero aërem frigidiorē in motu suo perturbato & ad stases in pulmonibus faciendas coacto. Intendit autem Natura in hoc morbo vel resolutio-

lutionem sanguinis vel suppurationem ejusdem, infra 7. tamen dierum spatium vix exspectandam: unde vehementiori sanguinis per corpus suum circulo unum vel alterum scopum exsequi conatur, de quo quidem motu adaucto pulsus durities, quam Pleuritidis, (addimus nos omnium inflammationum internarum) & præprimis Peripneumoniæ nostræ signum fere infallibile esse optime judicavit celeberrimus & facundissimus *Bagl. Prax. Med. L. I. C. IX.* satis superque testatur. Videmus ex hac theoria quid possint Vomitoria in principio morbi exhibita, ubi causa in ventriculo non latitat, nisi forsan iracundia immediate prægressa ad hanc evacuationem excitandam nos invitet? quid purgantia drastica auxilii afferant? utraque sane nil meo judicio, quin potius inflammationis adaugendæ capacia sunt. Venæsectionis autem sicuti in principio insignis potest esse utilitas, ita versus dies judicatorios celebrata insigne plerumque Naturæ damnum infert, dum vel discussionem vel suppurationem impedit. Eundem principii agentis ordinem pervertunt calidiora remedia cum diaphoretica tum pectoralia Elixiriorum, Essentiarum & Tincturarum nominibus resplendescencia, quippe quæ largiori inprimis manu propinata, æstum adhuc magis incendunt, & deliria invitant & neque discussionem blande instituendam, multo minus suppurationem exsequuntur. Quid vero de Opiatis dolorum mitigandorum causa in usum vocatis dicemus?

nullum sane in universo morbi decursu iisdem scribemus encomium , sed procul exfulare jubebimus, quia neque discussioni neque suppurationi conveniunt, sed utrique resistunt : Alvi solutionem uti proficuum in hoc morbo, ita diarrhoeas parum utiles observamus, abstinendum igitur à frequentioribus clysteribus erit, ni sputi suppressionem efflagitaverimus. Discutientia interne & externe suppurationis tempore præscripta pariter Naturæ intentioni sunt contraria, coctionemque impediunt ; suppurationia vero ab initio morbi statim exhibita, omnis discussionis spem adimunt , patientemque longiori morbo implicant, imo largius propinata insignem sæpius pectoris infarctum post se ducunt , videndum igitur quo tempore & qua dosi singula conveniant. Adhibent quidam specificè corticem Chacarillæ discutiendi scopo, quem tamen non promiscue usurpaverim , cum sensibilem subadstringendi facultatem possideat.

§. VI.

Post Peripneumoniam producimus ANGINAM, quæ à priori vix nisi ratione loci differt , habet enim eandem originem eandemque causam, sed peculiari loci differentia conspicua est. Inflammanitur nimirum in hoc affectu fauces , & quidem ita vehementer , ut Patientes difficillime spiritum trahant & non raro suffo-

suffocationis metum incurrant. Omittitur hic male ab initio Venæsectio, vel brachii, vel, quæ melior est, pedis, raninis solis adaperitis vel insufficientem sanguinis effluxum, vel largiorem ejusdem excretionem vix ullis remediis amplius compescendam comitem habentibus ; Perperam autem utraque evacuatio eo tempore demum suscipitur quo inflammatio jam ad suppurationem tendit. Vomitoria, neque in principio, neque in progressu, ullum habent locum. Purgantia quoque magis debentur nothæ, ubi fauces mucosæ sunt obsessæ, quam veræ, quæ lenientia & lubricantia interna potius exposcit. Omnia calidiora medicamina interna morbus hic plane respuit, cum inflammatio mirum in modum exinde intendatur. Ab initio quoque, ubi Natura discussioni adhuc dum invigilat, damnamus Gargarismata emollientia & suppurantia ; circa quartum vero diem ubi suppurationis indicia adsunt rejicimus discutientia *Joel. L. II. Pract. S. VIII.* secuti emollientia & suppurantia substituímus. Opiata procul esse jubemus ut & Vomitoria pro ruptione apostematis promovenda a quibusdam commendata. In Angina symptomatica, febribus malignis aliisque acutis sæpius familiari à Venæsectione & aliis evacuantibus fortioribus omnes fere cordati Practici abhorrent, & morbum potius primarium debitis remediis domare, quam incongruis talibus tentaminibus eundem pervertere student.

§. VII.

Ab Angina ad NEPHRITIDEM, Inflammationis speciem satis frequentem, aſt præ antecedentibus mitiorem, progredimur. Reſpiciſt in hoc affectu Natura excretionem hæmorrhoidum externarum & ob ſtaſin ſanguinis in peripheria renum factam diſcuſſionem per motum ſanguinis celerioſem molitur. Superveniunt autem ſæpiſſime huic affectui ob conſenſum nervorum non tantum vomitus, ſed concurrit etiam vix non ſemper, juſto parcius Urinæ & quidem albicantis, ſtriſturam harum partium ſatis arguentis, ſtillicidium, quod guttatim factum ægrotum acerbiffimis plerumque doloribus exercere ſolet. Etiaſi igitur Natura hoc in morbo Vomitionem ſponte inſtituat; nemo tamen ſuarum rerum expertus hoc molimen per Vomitoriorum aut Purgantium imprimis fortiorum exhibitionem facile imitabitur, cum ſedes mali non in Ventriculo ſed Renibus ſit; unde evacuationem hanc tantum pro ſymptomate, ob conſenſum partium excitato, habebit & hoſti primario obviam eundem eſſe concludet. Neque vero hoc faciet, ſicuti in Praxi vulgari ſæpiſſime hocce contingit, per diuretica atque pellentia, calculum pellendi ſcopo propinata, ad quæ non tantum fortiora, Terebinthinam ejusque Spiritum, Baccas & Ol. Junip. Succini, Balf. Ind. album, Millepedes: ſed &

& leniora , Asparagum, Petroselinum, Fraga, Armoraciam , Raphanum , Caseum , Sinapi, Allium referimus , multo minus per Salia Volatilia oſa , quorum omnium in excitando orgasmo virtus in vulgus quoque nota est ; unde solennius nihil est , quam ut per talia infausta conamina stasis & dolores cum mingendi difficultate insigniter augeantur ; sed imitabitur Medicus Naturæ minister ejusdem methodum & internis lenissimis remediis diluentibus , demulcentibus & antispasticis discussionem atque resolutionem absolvere conabitur. Cavebit sibi etiam ab Opiatis , quæ neglecta evacuatione sanguinis & demulcentium internorum usu, facillime ulcus renale , difficulter aut nunquam post hac sanabile , inducere possunt. Quod Venæsectionem attinet , eandem in Nephritide mitiori minime necessariam esse existimamus ; ubi vero insignis occurrit Plethora , ibi non tantum eandem suadendam , sed & serio injungendam esse censemus , secuti & in hac re Naturam Ducem , quæ per hæmorrhoides interdum Nephritidem solvit, teste *Hippocr. Aphor. IX. Sect. VI.* Sunt etiam qui in hoc morbo varii generis vulneraria præscribunt , sed , meo quidem judicio, selectu hic maximopere opus erit , cum fortiora adstringentia stases adaugeant & noxas ab Opiatis alias metuendas pari ratione producant. Externe Naturæ motibus resistimus , si vel penetrantiora discutientia , qualia sunt Camphorata, vel refrigerantia nimia præscribamur : illa quippe

quippe partem sanguinis subtiliorem discutunt, relicta crassiori ejusdem substantia ; hæc vero sanguinem stagnantem adhuc magis coagulant, ut propterea Naturæ scopo utraque minus sint congrua.

§. VIII.

Restant ex Inflammationibus PHRENITIS, PARAPHRENITIS, PLEURITIS, HEPATITIS & SPLENITIS, quibus adhuc accensendæ sunt VENTRICULI, PANCREATIS, UTERI & reliquarum partium Inflammationes. Cum vero ex theoria antecedentium Inflammationum facile appareat, quid Natura vehementiori sanguinis sui circulo in singulis intendat partibus, non difficulter etiam colligere erit, qua ratione salutare ejusdem scopi incongruis artificiis vulgo soleant perverti. Nimirum nullibi Vomitoriis aut Purgantibus causa mali principalis tollitur, unde etiam nunquam præscribenda sunt nisi biliosa recrementa ab initio primas oneraverint vias, in hoc enim casu priora poterunt aliquid præstare utilitatis. Venæsectiones uti ab initio ubique non absque fructu, imprimis si Plethora concurrat, celebrantur, ita imperite circa statum aut morbi decrementum in subsidium vocantur, ubi enim profundiores stagnationes factæ sunt, ibi sane frustra à crassioribus ejusmodi evacuationibus aliquid solaminis speramus; quod quidem in symptomaticis etiam

In-

Inflammationibus annotandum esse existimamus, quippe quæ vix non omnes ejusmodi evacuationes plane respuunt. Fortiora diaphoretica, Tincturas resinosas, producta Ææa, Æia volatilia omnes fere regiones imprimis vero Climata calidiora haud ferunt & plerumque majores ægri exinde reportant noxas. Quid vero à Modernorum Idolo, Opiata intelligo, sperandum sit, quivis intelligit; nisi enim parce & quidem in principio tantum propinentur, infastos ut plur. relinquere solent effectus. Externe formulæ aquosæ & refrigerantes, nec non calidiores, nimium ubique nocent, illæ sanguinem coagulando & ad putredinem disponendo; hæ vero eundem exagitando & inflammationem intendendo. Et hæc de Inflammationibus sufficiant.

§. IX,

Pergimus jam III. ad FEBRES BILIOSAS, CAUSUM & FEBREM CHOLERICAM, originem suam copiosæ bilis in ventriculum effusioni & quidem eo præcipue tempore, quo cibi in resolutione sua sunt constituti, debentes. Sicuti autem ratione causæ utraque febris quam maxime convenit, ita ratione moliminum æque differt, in Causo enim bilis fermentescens acerrima in Ventriculo & intestino duodeno detinetur & arctissime quasi concluditur; unde febrem ardentem acutissimam cum symptomatibus

C
bus

bus gravioribus conjunctam habet, qua Principium vitale partem affectam ab hoste ipsi imminente tutam conservare conatur: in cholera autem Natura bilem sibi molestanti *αὐτὴ καὶ καὶ* plerumque ejicit; unde febris etiam concurrens præ illa solet esse mitior & symptomata non ita molesta ac periculosa. Videmus hinc in posteriori casu cum Natura ipsa actualibus excretionibus sibi auxilium parare conetur, eidem nullis adstringentibus, nullis opiatis esse resistendum, sed potius felicissimi *Sydenh. Prax. Med. S. IV. C. 2.* ductu copioso diluentium supra & infra ingerendorum apparatu eandem potius in excretionem suam adjuvandam, ubi tamen inter perversa medicamina relata volumus Vomitoria & Purgantia stricte sic dicta, quippe quæ dum stimulando vim suam absolvunt, non tantum acrimoniam biliosæ materiæ exaltant, sed & motus febriles adaugent; unde ea quæ Naturæ moliminibus hic subveniunt è blandiorum evacuantium generibus debent esse desumpta. Ut vero ab initio morbi Opiata & Adstringentia plane damnamus, ita ejecto hoste & febre sensibilibiter mitigata eadem maxime proficua esse existimamus, dummodo in selectu medicaminis doseosque ejusdem debitæ non peccaverimus, fortiora quippe adstringentia & opiata minus correcta & hoc tempore sensibile afferre poterunt damnum. In priori vero Casu nempe Causo Natura fine suo nempe excretionem bilis non potitur, unde in primo morbi principio

Vomitorium aut Purgans lene perperam omittimus, secuti potius in hac re *Lalium à Fonte qui Consultat Med. CXXV. pag. 671. Naturam observare cupit, an quidquam illa moveat, an vero quiescat, quodsi Natura per alvum aut aliam partem evacuationem bilis moliatur, tum quiescendum; si vero deficiat à suo munere, tunc medicamenti exhibitionem Medico esse concessam*; dummodo autem hæc evacuatio inprimis per vomitum primo statim morbi contingat principio, alias partis affectæ inflammatio facillime intenditur. Nec denegemus in hoc morbo Patienti sufficientem potum, quem materiæ acrimonia & febris concurrens quam maxime expetit; non sit autem actu frigidus pro uti quidam ob æstum eo melius extinguendum commendant: stasis enim fortior & partis affectæ *νέκρωσις* exinde certissime metuendæ sunt. Adstringentia autem & Opiata in Causo nemo sanus facile propinaverit, cum Natura ipsa fortiori alvi & ventriculi constrictione bilem corruptam coërceat & insignem hoc in casu errorem committat, unde non obsecundandum eidem est in hac re, sed in morbi progressu alternantibus potius exquisitis auxilium ferendum. Diaphoretica stricte sic dicta in utroque morbo nullius sunt usus: Materia quippe peccans non per peripheriam corporis, sed vomitum & alvum præcipue solet excerni; unde quæ propinantur debent esse lenissima circulationis tantum æqualitati & abstersioni partium prospicientia. Simile de Venæsectione esto iudicium,

hæc enim plethoræ tantum consulit, qua deficiente nullum ab eadem sperandum auxilium; & etiamsi illa concurrat, hæc tamen non nisi in morbi principio in usum vocari poterit.

§. X.

Annumeravimus Febribus biliosis DYSENTERIAM EPIDEMICAM, quæ quidem etiamsi non semper à malignitatis nota libera sit, ortum tamen suum habere videtur à fermento subtili cum bile corporis nostri concurrente & summam eidem acrimoniam stimulantem inducente. Ejicit autem corruptam hanc biliosæ materiæ congeriem per intestinorum tractus frequentibus alvi solutionibus Natura & simul febrem excitat, ut in parte affecta recrementa noxia corpori suo exitium minitanti abstergat. Scopus igitur hic Naturæ salutaris maximopere considerandus, ut vel in principio saburra biliosa securo Vomitorio, quale radix Ipecacoan-
 ha est, exterminetur, vel in progressu lenibus Laxantibus & Clysteribus abstergentibus idem absolvatur finis. Ex quibus facile comparet perversa plane illos uti methodo, qui mox ab initio adstringentia pro fluxu moderando, per se non ita facile lethali exhibent, vel pro doloribus concurrentibus satis exquisitis leniendis largiori propinant manu Opiata: hæc quippe uti in simplici diarrhœa teste *Bagliv. Prax. Med. L. I. C. diarrh. & dysent. viscerum & intestinorum*
 ob.

obstructiones difficulter solubiles , quibus tandem succedit Hydrops pertinax , introducunt: ita in Dysenteria materiam peccantem acerrimam coërcendo majorem inflammationem & subsequentem deleteriam gangrænam invitant; unde in principio non danda adstringentia esse ex præcepto Cratonis ante septimum diem optime judicavit modo laudatus *Bagliv.* Non tantum autem huc referimus fortiora ex ♂li pro-
sapia & vulnerariorum adstringentium desum-
ta classe remedia , sed & mitiora Corall. ppt.
Smaragd: ppt. Spec. de Hyac. Rad. Tormentill.
Cort. Chacarillæ , quorum omnium ab initio,
ubi dolores & febris adhuc vigent providus de-
bet esse usus, sicuti vero his artificialibus cona-
minibus salutare Naturæ motus sistuntur , ita
eosdem nequaquam promovendos esse existi-
mamus purgantibus, aut Vomitoriis in progres-
su morbi , ubi febris jam ardet, exhibitis , sed
scopo huic faciendum satis arbitramur lenissi-
mis, diluentibus , mucilaginosiis, præcipitanti-
bus & abstergentibus. Et ubi horum usus re-
cte applicatus fuerit, quod ex imminutione Fe-
bris atque dolorum facile patefcit, tunc demum
supra nominatorum subadstringentium & O-
piatorum insignis poterit esse utilitas. Ad in-
congrua porro remedia quibus Naturæ ordo in
hoc morbo pervertitur referimus diaphoretica
fortiora , quibus materia fermentescens adhuc
magis sanguini communicatur & vires per fre-
quentes jam dejectiones consumptæ , adhuc

magis prosternuntur. A potu frigido & largis haustibus ingurgitato dehortamur, nisi illic inflammationem gangrænodem, hic vero frequentiores dejectiones pro præmio desideraverimus, Venæsectio morbo huic, à plethora non dependenti, primario haud convenit, quod si autem posterior concurrat, ab initio eandem non tantum non reformidandam sed & tuto celebrandam esse censemus, cum alias Natura hoc officium ab arte neglectum non raro copiosa sanguinis per anum ejectione refarcire soleat.

§. XI.

Tractavimus hætenus febres acutas continuas non remittentes, ordo jam exposcit ut ad remittentes nos accingamus; Sunt autem hæ **CATARRHALIS BENIGNA**, Tertiana & Quartana continuæ, quarum prior à Natura ob serum acrius in pulmonibus & faucibus collectum excitatur, ut partes noxiæ auctiori sanguinis circulo removeantur & metuenda sphacelosa corruptio præcaveatur. Exsequitur autem hunc scopum Principium nostrum vitale blande per plures quasi paroxysmos, quos quotidie circa vesperam, absque frigore, sed solo æstu vehementiori instituit, & ad alterum fere mane continuo tenore protrahit, donec per sudores partim, partim intervenientes diarrhœas 14. circiter dierum spatio ad felicem perveniat exitum. Nihil hic peragitur vi, sed
omnia

omnia procedunt blande; unde in medendi methodo, cui Medicus insistat, à Purgantibus Stimulantibus & Vomitoriis vix non omnibus, ni forte hæc primarum viarum molestiæ specialiter exposcant, abstinendum erit, nisi materiæ morbificæ indolem jam per se satis subtilem penetrantiorē reddere placuerit. Neque etiam rem Venæsectione absolvere quis contendet, utpote quæ nisi exquisitum diapnoicum regimen comitem habeat, sæpissime circa dies Criticos incompleta molimina hæmorrhagica in Deliria & Comata, plerumque lethalia, abeuntia post se trahit. Unde plane potius ab eadem abstinendum, nisi specialissima quædam circumstantia ejusdem usum ab initio suadeat, quam incongrua adhibitione damnum corpori inferendum esse censemus. Sicuti autem hoc contingit ex generalium mala applicatione, ita in specialium usu insignis committitur error, si contra tenuem hanc rheumaticam materiam remedia calidiora resolvendi & discutiendi scopo propinantur: hæc enim si largiori versus paroxysmos præprimis, manu exhibeantur, benignam hujus morbi indolem plane pervertunt & malignam periculosamque eidem inducunt faciem, ita ut quandoque exanthematum eruptiones exinde originem habeant: qua propterea quidem leniora alexipharmaca, uti v. g. est Tinctura alexipharmaca Stahlii, in principio paroxysmorum concedimus, sed tantum in fine ejusdem ubi lenis sudor promovendus est. Si-

mile

mile fere detrimentum infertur à remediis anticatarrhalibus, radicibus resinosis, lignis antiſepticis, gummis, resinis, quippe quæ in catarrho simplici alias satis proficua, nostræ materiæ morbificæ minus sunt adæquata, sed eandem potius exagitant, causticamque magis reddunt, quam quidem exagitationem & Salia Volatilia perficiunt, quæ simul virtutem suam in fibras exercent easdemque stringendo in sensibilibus varia damna excitant. Dum vero superius innuimus, quod morbus hic blando partim sudore, partim alvina evacuatione plerumque solvatur, insignem iterum illi committunt errorem qui utramque evacuationem plane spernunt, & nullam rationem habent neque excretionis sudoris, quæ tempore præcipue matutino contingit, neque resolutionis alvinæ quæ optime versus paroxysmos lenibus Clysteribus perficitur.

§. XII.

Catarrhalem benignam excipit Febris **TER-
TIANA CONTINUA**, hic locorum ob epidemicam suam aliquot abhinc annis grassationem notissima. Excitatur hæc à Natura ob tenue fermentum biliosum in primis viis latitans & sanguini simul communicatum, quod pluribus paroxysmis alternis diebus institutis & per 14. 20. imo 30. horas æstu satis insigni protractis, in principio vomitibus partim, partim largioribus
su.

sudoribus in fine eorundem, partim denique eodem tempore per Urinam è corpore eliminare satagit. Resistimus salutari huic Naturæ intentioni, si has evacuationes vel susque deque habemus, vel incongruis aut perverse adhibitis medicaminibus Naturæ succurrere suscipimus. Prius fit (α) Inconveniente regimine, jectigatione nimia in lecto aut refrigerio externo æstus protrahente & sudorem inhibente (β) Diæta simili, frigidæ imprimis ingurgitatione, idem damnum inferente; Posterius autem (γ) Purgantium stimulantium aut nodulorum laxantium cum vino paratorum, in intermittentibus potius proficuum, præscriptione vel eorundem in paroxysmis exhibitione, quorum illa febris augmentum, hæc vero typi perversiōem post se ducit (δ) Calidioribus diaphoreticis in vigore paroxysmi propinatis quæ eundem diutius protrahendo non raro febrem ex intermittente & acuta compositam vere acutam efficiunt: Cum enim Natura primis paroxysmi horis nullum sudorem intendat, sed materiæ interne stagnantis emollitionem & resolutionem & sui refocillationem exposcat, facile apparet omnia diaphoretica non nisi tempore eruptionis, quæ circa finem singulorum paroxysmorum large contingit, locum habere, ubi quidem plerumque lenissima, quia ipsa Natura ut plurimum sibi consulit, sufficiunt. (ε) Absorbentibus largius pro æstu extinguendo ordinatis, utpote quæ in siccioribus facile lentas & hæcticas invitant

D

tant (δ) Acidis ob eundem finem in majori, quam par est, dosi exhibitis, à quibus ob coagulationem humorum & insufficientem materiæ febrilis excretionem infarctus quandoque viscerum & morbi chronici oriuntur (ε) Opiatis cephalalgiae & agrypniæ oppositis, quibus omnes fere excretiones salutare inhibentur & stasibus subsequenter ansa præbetur (ζ) Sacra moderorum quorundam salutis anchora Cort. Chin. Chin. aut similibus adstringentibus antifebrilibus, quæ motus febriles supprimendi scopo tertio, quarto aut quinto jam paroxysmo, antequam materia morbifica sufficienter secreta & excreta est, exhibita, nostrum quidem adimplent scopum, sed vel novas recidivas, Naturæ quidem, non medicaminis, beneficio, vel materiæ febrilis stagnationes, viscerum obstipationibus inservientes, vel mortes subitaneas vel alias deplorandas rerum catastrophas post se ducunt, ita ut quivis scientiæ & conscientiæ consulturus à tam ambigui effectus & eventus medicaminibus non immerito deterreatur & tam diu ab iisdem abstineat, donec tempus morbi ipsiusque ratio eorundem usum securius permittant, quod quidem ante septimum paroxysmum vix fieri plura argumenta persuadent. Venæsectionem quod attinet, illa primario huic morbo non convenit, cum Natura sanguinis depletionem in eodem haud intendat; quod si tamen insignis concurrat Plethora, & adstantes perverso plerumque præiudicio commoti

moti eandem anxie desiderent , meo quidem iudicio concedi poterit, dum modo non in ipso Paroxyfmo, fed verſus eundem in ſtatu ægroti tranquilliori inſtituatur.

§. XIII.

Cum Febre Tertiana Continua aliquam habet affinitatem **QUARTANA CONTINUA**, cujus Paroxyſmi nunquam uti illius prorfus intermittunt, ſed tantummodo remiſſionem caloris poſterioribus duobus diebus oſtendunt. Cauſa illius quærenda videtur in obſtipationibus vel infarctibus viſcerum hypochondriacorum , in ſcirrhoſitatem jam inclinantibus. Ob has enim Natura motum febrilem, æſtum primo die aridum, moleſtiſſimum inſtituit ; eundemque remiſſiori calore ad novum inſultum uſque protrahit & hoc quidem pluribus paroxyſmis eum in finem perficit , ut auctiori ſanguinis circulo & propulſu per partes affectas ſtaſin reſolvat, partesque noxias per loca convenientia lente excernat. Hanc Methodum Naturæ blandam pervertimus , ſi Vomitoriis rem aggredi tentemus: hæc enim nulli infarctui aut ſtaſi ſunt utilia , ſed potius iisdem adaugendis admodum convenientia. Idem contingit, ſi purgantia reſinoſa atque ſtimulantia loco lenientium atque relaxantium præſcribamus : non tantum enim eandem ac priora noxam inducunt, ſed quandoque etiam veras acutas febres

invitant. Neque etiam lenientia in principio paroxysmorum locum habent, quia typus febris facillime talibus artificiis pervertitur, sed tempore tantum à febre intercalari, ita quidem eadem exhibendo, ut effectum exserant antequam novus paroxysmus ingruat. Vim quoque Naturæ inferunt V. Snes s. in principio s. medio morbi cursu institutæ: nil quippe his efficiamus, quam ut corpus tale morbosum per se jam minus activum, viribus suis privantes, hosti tradamus ut eo citius vincatur. Cum præterea æstus aridus per plures horas continuans & concurrens sitis cum molestissima oris siccitate interni caloris nos satis certiores reddat, facile colligere est, diaphoretica, alexipharmaca & similia hoc tempore minus esse proficua, utpote quæ sanguinem magis exagitant & sudorem cui excitando propinquantur difficillime exprimunt, ob intentionem Naturæ prorsus contrariam: hæc enim cutem satis firmiter in hoc morbo stringit & non nisi in fine paroxysmorum lenem, quandoque vero prorsus nullum ejicit sudorem. Quando autem per absorbentia & acida largiori manu propinata æstum extinguere suscipimus, facile stases adaugemus & vel Hæcticas vel Hydropes invitamus. Qui quidem deplorandus effectus eo certius insequitur, quo proniori manu ad adstringentium antifebrilium accedimus usum: quippe quo viscera interna, antequam resolutio materiæ stagnantis facta est, stringuntur & scirrhusa iisdem

dem inducitur labes, ita ut postea modo nominati morbi presso pede insequantur.

§. XIV.

Perlustratis hactenus febribus acutis benignis, tam remittentibus, quam non remittentibus, ordo jam exposcit ut ad malignarum classem accedamus. Diximus autem superius, dividi has febres in malignas stricte sic dictas & permalignas. Ad has retulimus Pestem & Sudorem Anglicum: ad illas vero febrem Catarrhalem Malignam, Petechialem, Miliarem, Variolas & denique Morbillos. Ex prioribus itaque primo occurrit PESTIS, morbus omnium vehementissimus, in quo Natura inter spem & metum constituta motibus febrilibus regularibus miasma fermentescens subtilissimum vel per sudores, vel Carbunculos vel Bubones & Parotides è corpore eliminare satagit; instituit præterea alias quandoque excretiones, nimirum Vomitus, Diarrhœas & Petechias, easdemque plerumque lividas nigricantes, quæ tamen omnes ut plurimum funestum indicare solent eventum. Patet ex his in methodo medendi quam maxime respiciendum esse, tum ad causam morbificam s. venenum illud subtilissimum, quod corpora nostra inquinat & intra paucos dies horrenda strage enecat; tum motus quibus Natura sibi contra tantum hostem consulere solet; Cum vero illud tam subtile sit, ut nullis excretionibus vio-

lentis obediat, Natura optima medicatrix, nulla quoque in medendi utitur vi, sed blandiori febricula excretiones sibi salutare perficit. Hanc itaque Ducem in Curatione secuti nullum dabimus locum Vomitoriis, Purgantibus, V. Snibus, Alexipharmacis & Cardiacis calidioribus aut spiritibus urinosi : hæc enim omnia insigne morbo afferre damnum testantur cum literæ à D. J. G. K. de Peste Dantiscana exaratae, tum elegantissima *Dissertatio de nuperrima Peste Provinciali*, à D. A. . . . M. D. & P. in lucem emissæ : ansam quippe hæc remedia præbent incongruis excretionibus supra nominatis, deleterio ut plurimum eventu stipatis. Imo dehortatur etiam modo laudatus scriptor Gallus haud absque injuria à jusculis saturatis carniū sanguinis æstum nimium incenditibus, ut & suffimigiis resinosis, eandem ac Cardiacā calidiora noxam inferentibus : Subtilissimum enim venenum subacidis interne & externe usurpatis potius figendum & lenibus diapnoicis ejiciendum, per talia acria adhuc magis resolvitur, ut deleteriam suam virtutem eo citius absolvere possit. Imperite quoque excretiones Criticæ Anthracum & Bubonum per discutientia fortiora tractantur : hæc enim sæpius præbent occasionem retrocessioni materiæ & subsequenti funesto morbi eventui.

§. XV.

Sequitur jam SUDOR ANGLICUS qui à
Peste

Peste non nisi ratione symptomatum differt: sicuti enim in hac Natura per excretiones Criticas, Anthracum, Bubonum & Parotidum sibi consulit, ita in illo nihil horum contingit, sed vehementi tantum sudore non aquoso sed nebuloso s. halituoso sensibili corpori prospicitur; & nisi hic ad exitum perveniat, patiens intra 12. aut 24. horas ut plurimum opprimitur. Vid. *Opusc. Chym. D. Stahliz. pag. 640.* Ex insigni hac humorum resolutione patescit, crassiores supra notatas evacuationes, nec in hoc convenire morbo cum nil nisi anomali Naturæ motus exinde expectandi sint, sed omnia tranquille peragenda esse, quod etiam ipsa confirmat Experientia, qua edocemur nullis plane medicaminibus, sed sola ægrotantis continentia tranquilla, faciliiori sudoris eruptioni famulante, hunc morbum ut plurimum edomari.

§. XVI.

Per malignas Febres excipiunt Malignæ & inter easdem primo CATARRHALIS MALIGNA & PETECHIALIS: quæ quidem cum non nisi gradu differant, merito sub uno comprehenduntur capite. Sumit autem utraque febris suam originem à materia acri caustica fermentescente subtilissima, quam Principium nostrum vitale per motus secretorios & excretorios adauctos 14. circiter dierum spatio per insensilem transpirationem Urina & alvinam evacuationem

nem excernere intendit. In priori quidem casu nulla exanthemata comparent: in posteriori autem ubi plerumque temperamentum activius vel regimen calidius concurrit, maculæ rubicundæ, petechiæ dictæ, in peripheria corporis erumpunt, non absque sensibili levamine, dum modo debito colore roseo nimirum vel rubicundo resplendescant. Omnia & in hoc morbo fiunt tranquille, nec ulla evacuatione fortiore corpori consulitur. Vomitoria quidem ab initio morbi exhibita, impr. si biliosa recrementa in Ventriculo hæreant, interdum aliquid levaminis conferre videntur, præcipue in corporibus robustioribus; quod si vero post aliquot demum dies ordinantur, insignes ut plurimum post se ducunt anxietates cardialgicas & regularem morbi typum sensibilibiter perturbant. Purgationes, vim suam diutius extendentes, idem fere detrimentum afferunt, dum diapnoën corporis supprimunt & ad diarrhoeas in principio & statu morbi non adeo salutares, in primis, si artificiales fuerint, disponunt. Venæsectiones vero nullo tempore causæ morbi eliminandæ sunt idoneæ, sed plerumque versus dies Criticos incompleta molimina hæmorrhagica, in deliria, comata & lethargos abeuntia, post se ducunt, & hoc quidem eo certius, quo magis à tempore verno sumus remoti. Sudationes fortiores per Alexipharmaca & Cardiaca calidiora, Tincturam Myrrhæ, Bezoardicam Mich. Essent. Alexipharmacam Stahlî, Camphoram & Pulveres

Be-

Bezoardicos varios , aut regimen simile stragulis copiosis, quibus miseros patientes totos plerumque involvunt , in principio morbi excitatæ, vires insigniter prosternunt & diebus criticis suppressionem sudoris post se trahunt; loco vero illius Deliria , Comata, Convulsiones, Lethargos , à Congestione sanguinis in superioribus partibus facta, originem habentes inducunt. Sicuti vero crassis ejusmodi evacuationibus blandus morbi genius plane pervertitur, ita quoque incongrue symptomatibus quibusdam concurrentibus vulgo obviam itur. Scilicet opponunt diarrhœis sæpissime morbum hunc excipientibus, adstringentia & opiata fluxum inhibendi scopo , sed eo ipso partem causæ morbificæ, quæ salutariter præcipue in decremento morbi per has vias evacuari solet, in corpore retinent, & novis stagnationibus ansam præbent , insci prorsus , omnes adstrictiones alvinas solutionibus esse periculosiores ; unde nec usum Cort. Chacarillæ ab Apino in febre hac specificè laudati in hoc casu facile commendaverim cum sensibili adstringendi efficacia præditus sit. Præterea pro agrypnia & cephalalgia mitigandis communiter præscribunt opiata aut etiam refrigerantia externa ; sunt vero hæc petechizantibus adeo inimica ut excretiones debitæ eis plerumque inhibeantur & loco illarum lethales internæ inducantur stases , prouti hæc omnia solide demonstravit Illustris Stahlius in duobus mensibus de febre epidemica petechizante &

alvi libero successu conscriptis & Opusc. Chym.
pag. 608. & 660. infertis.

§. XVII.

Febrī petechiali quoad malignitatem proxime fere accedit MILIARIS. Est autem hæc febris acuta exanthematica, qua Natura miasma quoddam subtile ad fermentationem putredinosam pronum transpiratione adaucta sub pustularum semen ferè milii referentium forma ad peripheriam corporis propellere conatur. Perficit autem hanc excretionem Natura non una vel altera die, sed semi & criticos dies pro eadem instituenda & absolvenda observat. Die sc. quarto circiter maculas rubicundas in superficie corporis ejicit, in harum medio ad septimum usque diem format pustulas pellucas albicantes quas postea si per quatuor, interdum vero plures dies, substiterunt, exsiccat, & tandem sub squamarum forma deponit, ita ut morbus fere duplici septenario absolvatur, nisi temperamenta minus activa in quibusdam tardiorē exanthematum eruptionem & exsiccationem, similemque postea morbi solutionem producant: Occurrit autem hæc febris vel per se absque alio morbo, vel cum petechiis, variolis aut morbillis complicatur, ubi summam plerumque malignitatem indicat. In utroque vero casu blande procedit, nec ullam fortio-
rem evacuationem per se intendit. Ex quibus ma-
nife-

nifestum est, omnes fere errores practicos, quos in præced. § allegavimus & hic notandos esse. Nimirum causa morifica neque Vomitoriis, neque Purgantibus, neque Venæsectionibus (ex-
cipio hic casum febris miliaris à lochiis suppressis ortæ, quæ eandem primo morbi insultu omnino exposcit) sive in principio sive in progressu morbi, quod pejus, ea exhibeantur, edomatur, sed ob summam subtilitatem suam per poros cutis, tanquam locum convenientissimum, lente excerni cupit. Ob hanc tardio-
rem excretionem neque frequens cardiacorum & alexipharmacorum usus neque regimen calidius, à Medicis & adstantibus frequentissime vel injunctum vel concessum locum habebit; Sed peragetur potius hoc negotium tranquilla continen-
tia, remediis diapnoicis temperatissimis non adeo frequenter exhibitis, dilutione sufficiente & refocillatione debita, ni damna superius memorata desideraverimus. Diarrhœis supervenientibus nulla opponemus adstringentia, à quibus easdem vel augeri vel morbum pejorum symptomatum accessu atrocio-
rem reddi optime notasse credimus Doctiss. *D. Hamilton Anglum in Tr. de feb. Miliare pag. 72. cui simul pag. 104.* Historiam hujus morbi ex Opii usu in Apoplexiam desinentis inseruit, quæ ad opiatorum noxam ostendendam hoc loco sufficere poterint.

§. XVIII.

Sequitur jam morbus ubique fere terrarum

notissimus, qui infantes præcipue corripere solet, puto VARIOLAS. Sunt autem hæ pustulæ majores in superficie corporis comparentes, quas Natura ob fermentum malignum ad coctionem purulentam pronum, in peripheria format, ut sanguinem à Miasmate s. fermento hoc plane peculiari liberet. Instituit vero hoc negotium blande prorsus & certis diebus motibus vitalibus adauctis, secretionibus scil. & excretionibus, sola plerumque nisi aliunde impediatur, absolvit, à quorum motuum apparatu symptomata ab initio, antequam eruptio variolarum contingat, in quibusdam occurrentia, & eandem jam eminus respicientia, originem suam habent, existimo Hæmorrhagias narium, Vomitus, Diarrhœas & Convulsiones, quæ ultimæ secundum Sydenhamii aliorumque solertem observationem, Variolarum, proxime erumpentium signum esse solent. Contingit autem vera harum pustularum eruptio die circiter. 3. l. 4. & primo quidem in facie postea vero in toto corpore sub macularum rubicundarum forma sese conspiciendam præbet; continuat hac ratione ad septimum usque, ubi suppurationem subeunt pustulæ cum circulo ambiente rubro & interjacentis cutis inflammatione: die undecimo suppuratio definit & exsiccatio incipit ad 14. usque diem pergens, quo tempore Variolæ quoad potiolem partem exsiccatae decidere solent, aliis per plures adhuc dies imprimis in partibus exterioribus ægrotum divexantibus.

Cum

Cum vero hic morbus præ omnibus aliis sola autocratia Naturæ ut plurimum superetur ratio quoque, experientia omnium fere Practicorum suffragante dictitat, omnem remediorum faraginem, quæcunque demum illa fuerit, noxiam magis quam proficuum esse & eidem expectationem potius ab Harveo Anglo tantopere in morbis commendatam substituendam, nec non continentiam ab ægrotis tranquille observandam. In specie vero omnia remedia minus hic locum habent quæ blandum Naturæ ordinem quovis modo turbant. Referimus vero ad eadem (1) Vomitoria solidas atque fluidas partes insigniter commoventia, quicquid etiam experientia Gundelsheimeriana reclamet. (2) Venæsectiones hæmorrhagias symptomáticas versus criticos dies excitantes, nisi quidem hic manifesta Plethora, illic vero saburra primarum viarum in quibusdam subjectis contrarium suadeat. (3) Purgantia ad Diarrhœas morbo huic per se, ob motum à peripheria ad Centrum s. interna directum, prorsus contrarias & plerumque funestas, disponentia, ad quæ Clysteres referendi sunt, qui tempore eruptionis alvum referandi scopo applicantur. (4) Bezoardica & Alexipharmaca, nec non Cardiacalargius ingesta, quorsum imprimis pertinet decantatissimus Pulv. Pannon. ruber, qui paulo copiose propinatus ob sensibilem adstringendi vim strictureas internas insigniter auget & aphthas periculosissimum symptomata aliaque mala

facillime procreat: Aqua fumarix in quibusdam locis ad plures uncias exhiberi solita, à qua Illustris Stahlius & Excellentiss. Hoffmannus passim in scriptis suis tanquam remedio calidiori non immerito dehortantur: Vinum rubellum à plebe in copia sæpius variolis correptis exhibitum: Decoctum lentium saturatum pro potu ordinario commendatum & similia sanguinem nimis exagitantia & excretiones immaturas, sæpiissime lethales post se ducentia. (5) Regimen calidius per hypocausta probe calefacta, & lectos, quibus misellos ab initio statim quasi incarcerant, quam tamen rem primis diebus ægrotis noxiam magis quam proficuum esse optime notavit Sydenhamius Anglicus. (6) Adstringentia & Opiata, vel Hæmorrhagiis initio morbi, vel Diarrhœis statui vel decremento ipsius critice quandoque supervenientibus opposita; quibus materiam acrem retundimus & ad viscera repellimus ut postea Aphthæ, Deliria, Convulsiones exinde initium sumant: Ultimo etiam verbum dicendum est de inconsulto quorundam conamine, quo Variolas, antequam maturæ sint, acu pertundere solent: hoc enim suppuratio & debita evacuatio puris impeditur, & repullulationi novarum excretionum aut aliis incommodis ansa præbetur.

§. XIX.

Cum Variolis tam quoad excretionis quam
cu-

curationis modum conveniunt **MORBILLI**.
 Sunt vero Morbilli stigmata rubicunda eminentia lenticulari conspicua, quæ Natura sub leni febricula 3. vel 4. invasionis die, ob fermentum quoddam peculiare in corpore latitans, ejicit, & postquam primo caput, post truncum & denique artus per aliquot dies occuparunt, & pruritu satis sensibili exercuerunt, iterum discutit partim, partim exsiccat & sub squamarum forma deponit. Causam autem morbificam materiam satis acrem esse testantur concurrentes tusses insignes, perpetui fere hujus morbi comites, inflammationes & pruritus oculorum aliaque symptomata. Ejicit vero partem hujus materiæ Natura quandoque per alvum, Diarrhœa scilicet per plures dies continuante, qualem nunc hic locorum omnibus fere morbillis affectis salutariter accidere certo mihi constat, ita quidem ut excretiones reliquæ solennes nihil exinde capiant detrimenti, sed potius tolerabilius decurrant. Omnia itaque quæ in §. præced. de Variolis notata sunt & hic locum habent, in primis autem ea quæ de adstringentibus & opiatis diximus in mentem sunt revocanda, ne forte adstrictione fluxus alvini universum morbum deteriore reddamus, aut plane complicationi exanthematum miliarium, quod quandoque contingit, occasionem præbeamus. Blandissimus enim morbus est, temperatissima propterea remedia motibus & ordini Naturæ correspondentia sunt præscribenda; quæ quidem si selegerimus & conveniente tempore

pore exhibuerimus optimam semper Naturæ
methodum uti in hoc morbo, ita & in univer-
so Februm negotio non perturbabimus, sed
tanquam veri Naturæ ministri non Domini, ei-
dem insistentes, pretiosissimam ægrotis auxili-
um nostrum implorantibus restituemus valetu-
dinem, dummodo Summus Medicus
DEUS, cui sit Laus, Honor &
Gloria, annuerit.

F I N I S.

